



Vaksin dos tunggal, CanSino dari Beijing, China tiba di KLIA, Sepang pagi tadi. /FOTO IHSAN MOSTI

# Vaksin CanSino tiba di Malaysia hari ini

Oleh NUR SHARIEZA ISMAIL 20 Ogos 2021, 11:19 am



SEPANG – Sebanyak 200,000 vaksin dos tunggal CanSino berbentuk 'finished product' daripada pembekal CanSino Biologics, China tiba di Lapangan Terbang Antarabangsa Kuala Lumpur (KLIA) di sini pada pukul 7.50 pagi tadi.

Kementerian Sains, Teknologi dan Inovasi (MOSTI) memaklumkan, vaksin CanSino itu dibawa menaiki MAS Kargo menerusi pesawat MH361 dengan penerbangan dari Beijing, China.

Katanya, vaksin CanSino yang diterima itu adalah sebahagian daripada 3.5 juta dos vaksin CanSino yang telah ditempah oleh negara ini dengan penghantaran dibuat secara berperingkat.

"Bekalan ini akan dapat memperhebatkan lagi Program Imunisasi Covid-19 Kebangsaan (PICK) terutamanya di kawasan rendah akses.

"Ia seterusnya akan membantu negara mencapai sasaran imuniti kelompok seperti yang disasarkan dalam Pelan Pemulihan Negara mengikut garis masa yang ditetapkan," katanya hari ini.

Hadir menyaksikan ketibaan tersebut adalah Ketua Setiausaha MOSTI, Datuk Dr. Siti Hamisah Tapsir dan Ketua Setiausaha Kementerian Kesihatan (KKM), Datuk Mohd. Shafiq Abdullah.

Vaksin CanSino mendapat kelulusan penggunaan bersyarat untuk kegunaan kecemasan di Malaysia oleh Pihak Berkuasa Bekalan Dadah (PKBD) pada 15 Jun lalu.

Solution Biologics adalah Pemegang Pendaftaran Produk bagi CanSino di Malaysia. -K! ONLINE